



**SLUŽBENI GLASNIK
NOGOMETNOG/FUDBALSKOG SAVEZA
BOSNE I HERCEGOVINE**

NOGOMET/FUDBAL BIH

**P R A V I L N I K
O NOGOMETNIM/FUDBALSKIM
TAKMIČENJIMA BOSNE I HERCEGOVINE**

Sarajevo, juni/lipanj 2020. godine

Izvršni odbor Nogometnog/Fudbalskog saveza Bosne i Hercegovine, na osnovu člana 35. Statuta Nogometnog/Fudbalskog saveza Bosne i Hercegovine, na sjednici održanoj 30.06.2020. godine, donosi

P R A V I L N I K **O NOGOMETNIM/FUDBALSKIM** **TAKMIČENJIMA BOSNE I HERCEGOVINE**

I - OPŠTE ODREDBE

Član 1.

Pravilnik o nogometnim/fudbalskim takmičenjima Bosne i Hercegovine (u daljem tekstu: Pravilnik) sadrži osnovne odredbe o sistemu takmičenja nogometa/fudbala i futsala, kao i opšte uslove takmičenja.

Član 2.

Ovaj Pravilnik obavezan je za sve organe i tijela Nogometnog/Fudbalskog saveza Bosne i Hercegovine (u daljem tekstu: NS/FS BiH), a svi ostali propisi koji se odnose na sistem ili uslove takmičenja moraju biti u skladu sa odredbama ovog Pravilnika.

Entiteski savezi mogu svojim propisima regulisati pitanja iz ovog Pravilnika, koji se odnose na takmičenja u njihovoj nadležnosti, s tim da ti propisi moraju sadržavati jedinstvene norme iz propisa NS/FS BiH.

Dužnosti i obaveze rukovodstva i učesnika u takmičenju utvrđuju se ovim Pravilnikom, Propozicijama takmičenja i drugim propisima NS/FS BiH i saveza nadležnih za organizovanje takmičenja.

Član 3.

Nogometna/fudbalska i futsal takmičenja mogu biti povremena i stalna. Status takmičenja utvrđuje se odredbama ovog Pravilnika.

Član 4.

U smislu ovog Pravilnika, pojmovi koji su upotrijebljeni u muškom rodu jednako odnose se na osobe oba spola.

II - SISTEM STALNIH TAKMIČENJA

Propozicije takmičenja

Član 5.

Za svako takmičenje se propisuju propozicije takmičenja koje donose ovlašteni organi, shodno odredbama ovog Pravilnika, Pravila igre nogometa/fudbala, futsala i ostalih pravilnika NS/FS BiH.

Propozicijama takmičenja se utvrđuju uslovi za organizovanje i provođenje takmičenja, uključujući tačne i jasne odredbe o finansijskim pravima i obavezama i načinu bodovanja.

Propozicije ne mogu biti u suprotnosti sa odredbama ovog Pravilnika, odlukama kojima se uređuje sistem takmičenja i ostalim aktima NS/FS BiH.

Takmičenja se mogu organizovati po jednostrukom i dvostrukom kup-sistemu i

jednostrukom, dvostrukom, trostrukom i četverostrukom bod-sistemu, kao i kombinovano: bod- sistem i kup-sistem.

Pravila igre

Član 6.

Sve javne utakmice nogometa/fudbala i futsala, u organizaciji NS/FS BiH i njihovih organa, organizacija i članova, igraju se prema Pravilima igre, uputstvima i instrukcijama koje donosi Međunarodni nogometni/fudbalski odbor koji donosi Pravila igre – IFAB, a objavljuje Svjetska nogometna/fudbalska asocijacija – FIFA. Ovo se također odnosi i na uputstva koja objavljuje UEFA.

Obavezne odluke za primjenu Pravila igre koje donosi Izvršni odbor NS/FS BiH i instrukcije i uputstva koja donosi Komitet za sudije i suđenje NS/FS BiH obavezni su za sve javne nogometne/fudbalske i futsal utakmice u Bosni i Hercegovini.

Službeni tekst Pravila igre, sa obaveznim odlukama NS/FS BiH vezano za primjenu Pravila igre, objavljuje Komitet za sudije i suđenje NS/FS BiH.

Sistem takmičenja

Član 7.

Generalna skupština NS/FS BiH utvrđuje jedinstven sistem takmičenja na teritoriji Bosne i Hercegovine.

Odluka o broju klubova u pojedinim ligama, donosi se najkasnije godinu dana prije početka takmičenja.

Izuzetno, u slučaju proglašenja stanja nesreće ili vanrednog stanja od strane nadležnih državnih ili entitetskih institucija, odluka o broju klubova u pojedinim ligama može se donijeti i najkasnije 3 (tri) mjeseca prije početka takmičenja.

Član 8.

Prijedloge za izmjene sistema takmičenja, broju liga - grupa i broju klubova u pojedinim stepenima takmičenja mogu podnijeti: za takmičenja u nadležnosti NS/FS BiH - najmanje jedan entitetski savez, za takmičenja u nadležnosti NS Federacije BiH – najmanje šest kantonalnih/županijskih saveza, za takmičenja u nadležnosti FS Republike Srpske – najmanje četiri područna saveza, a za takmičenja u nadležnosti kantonalnih i opštinskih saveza – prema propisima tih saveza.

Prijedloge za izmjene sistema takmičenja, broja liga – grupa i broja klubova u pojedinim stepenima takmičenja mogu podnijeti i nadležni takmičarski organi, odnosno udruženja klubova pojedinih liga.

Član 9.

Savezni stepen takmičenja su: Premijer liga BiH, Prva liga NS F BiH i Prva liga FS RS.

Nadležnost za rukovođenje po stepenima takmičenja utvrđuje se odlukom Generalne skupštine NS/FS BiH.

Za takmičenje u nižim stepenima takmičenja nadležni su entitetski, kantonalni, županijski, područni i opštinski savezi.

Stalna takmičenja

Član 10.

Stalna takmičenja na teritoriji NS/FS BiH su:

- Nogometno/fudbalsko prvenstvo BiH;
- Nogometno/fudbalski kup BiH;
- Nogometno/fudbalski super kup BiH;
- Nogometno/fudbalsko prvenstvo BiH za omladince;
- Nogometno/fudbalski kup BiH za omladince;
- Nogometno/fudbalsko prvenstvo BiH za kadete;
- Nogometno/fudbalsko prvenstvo BiH za pionire;
- Nogometno/fudbalsko prvenstvo za predpionire;
- Nogometno/fudbalsko prvenstvo za cicibane;
- Takmičenje predtakmičarskog uzrasta;
- Nogometno/fudbalsko prvenstvo BiH za žene;
- Nogometno/fudbalski kup BiH za žene;
- Takmičenje mlađih uzrasta u ženskom nogometu;
- Takmičenje u ženskom futsalu;
- Prvenstvo BiH u futsalu;
- Takmičenje mlađih uzrasta u futsalu;
- Kup BiH u futsalu.

Stalnim takmičenjima smatraju se i kvalifikacije za ulazak u viši stepen takmičenja, ukoliko su predviđene Propozicijama takmičenja.

Na nivou NS/FS BIH mogu se organizovati takmičenja nogometa na pijesku.

Kantonalni/Županijski/Područni nogometni/fudbalski savezi mogu organizovati i stalna takmičenja veterana.

Uslovi za organizovanje takmičenja

Član 11.

Prvenstvena takmičenja, organizuju se po sistemu liga. Svaki klub - ekipa jedne lige sastaje se dva puta sa svakim članom iste lige i to jednom kao domaćin i jednom kao gost, ukoliko drugačije nije predviđeno Propozicijama datog takmičenja (trokružno, četverokružno, kombinovano, i sl).

Lige mogu biti jedinstvene za odgovarajuće područje, ili podijeljene u dvije ili više grupa.

Broj klubova (ekipa) u ligi i grupama utvrđuje nadležni takmičarski organ pridržavajući se slijedećih principa:

a) amaterska takmičenja, počev od osnovnog stepena u opštini i završavajući sa trećim stepenom takmičenja, moraju se organizovati na principu ekonomičnosti i podobnim saobraćajnim vezama, tako da gostujući klub može u toku istog dana odigrati utakmicu i vratiti se u svoje mjesto;

b) utakmice se igraju u dane utvrđene kalendarom takmičenja.

III - OPŠTI USLOVI TAKMIČENJA

Takmičarska sezona

Član 12.

Takmičarska sezona počinje 01. jula/srpnja tekuće, a završava se 30. juna/lipnja naredne kalendarske godine, ako Izvršni odbor NS/FS BiH nije drugačije utvrdio Odlukom o kalendaru takmičenja.

Takmičarska sezona podijeljena je u dvije polusezone: jesen i proljeće.

Kalendar takmičenja

Član 13.

Stalna takmičenja odvijaju se prema kalendaru takmičenja kojeg donose organi nadležni za donošenje Propozicija takmičenja i to najkasnije mjesec dana prije početka takmičarske sezone.

Kalendar nižeg stepena takmičenja mora biti u skladu sa kalendarom višeg stepena takmičenja, koji se donosi posebno za svaku takmičarsku sezonu.

Raspored utakmica stalnih takmičenja

Član 14.

Raspored utakmica stalnih takmičenja utvrđuje nadležni takmičarski organ žrijebom, ukoliko Propozicijama takmičenja nije predviđeno drugačije.

Član 15.

Raspored utakmica stalnih takmičenja mora biti objavljen najkasnije mjesec dana prije početka takmičarske sezone, ukoliko propozicijama odnosnog takmičenja nije propisano drugačije.

Raspored odigravanja utakmica na pojedinim stadionima – terenima za igru donose nadležni takmičarski organi, a objavljuju u službenim glasilima najkasnije 8 (osam) dana prije početka takmičenja, ukoliko propozicijama odnosnog takmičenja nije predviđeno drugačije.

Promjena rasporeda utakmica

Član 16.

Utvrđeni raspored takmičenja može se promijeniti, ukoliko je zahtjev za izmjenu termina podnjet najkasnije 8 (osam) dana od dana utvrđenog za odigravanje utakmice, odnosno prema Propozicijama takmičenja. Ukoliko je zahtjev podnjet nakon roka iz prethodnog stava, neophodna je saglasnost i drugog kluba, a odluku o zahtjevu u ovom slučaju donosi nadležni takmičarski organ.

Utakmice se igraju u dnevnom i večernjem terminu utvrđenim rasporedom takmičenja.

Utvrđeni raspored prvenstvenih i kup utakmica može se izmijeniti samo na osnovu utvrđenih kriterija predviđenih propozicijama odnosnog takmičenja.

Pomijeranje određene utakmice ili određenog kola takmičenja ne može biti

učinjeno na štetu drugih zainteresiranih klubova, niti može omogućavati takmičarsku prednost klubovima čija se utakmica odlaže u odnosu na ostale učesnike istog takmičenja.

Odlaganje utakmica

Član 17.

Ako klub daje dva ili više igrača u bilo koju reprezentativnu selekciju Bosne i Hercegovine, radi odigravanja utakmica predviđenih kalendarom takmičenja, na njegov zahtjev, mora se izmijeniti raspored odigravanja prvenstvene ili kup utakmice.

Odluku o odlaganju utakmice donosi nadležni takmičarski organ i o tome pismeno obavještava klubove tri dana prije utvrđene utakmice čiji se termin pomjera.

Član 18.

Ako se odlukom nadležnog državnog ili entitetskog organa proglasi dan žalosti, nadležni takmičarski organ može odložiti sve nogometne/fudbalske utakmice zakazane za taj dan.

Viša sila (vanredno stanje ili stanje nesreće)

Član 19.

Ako se odlukom nadležnog državnog, entitetskog ili kantonalnog/županijskog organa proglasi vanredno stanje ili stanje nesreće, sve nogometne/fudbalske utakmice tog dana na toj teritoriji automatski se odlažu. Novi termin za odigravanje odloženih utakmica će odrediti nadležni takmičarski organ.

Termin početka utakmice

Član 20.

Termine početka utakmica stalnih takmičenja određuje nadležni takmičarski organ, vodeći računa o mjesnim i vremenskim prilikama.

Delegati

Član 21.

Za utakmice stalnih takmičenja nadležni takmičarski organ određuje delegata utakmice.

Ukoliko na utakmicu ne dođe delegat, dužnost delegata će obaviti posmatrač suđenja na utakmici. Ukoliko na utakmicu ne dođe delegat, a na istoj nije određen posmatrač suđenja, dužnost delegata će obaviti sudija.

Nadležni takmičarski organ donosi uputstvo o obavljanju dužnosti delegata.

Sudije

Član 22.

Utakmice stalnih takmičenja mogu suditi samo aktivne i ispitane nogometne/fudbalske sudije, koje se nalaze na listi za suđenje u takmičarskoj sezoni.

Za utakmice stalnih takmičenja sudije određuje Komitet za sudije i suđenje u skladu s odlukama i propozicijama datog takmičenja. Na utakmicama se mogu

odrediti dodatne sudije, peti i šesti sudija.

Sudija nije odgovoran za bilo kakav oblik ozljede igrača, službene osobe ili gledaoca, bilo kakav oblik oštećenja imovine ili bilo koji drugi gubitak koji pretrpi pojedinac, klub, organ saveza ili slično tijelo, zbog neke odluke koju je donio u smislu Pravila igre ili u odnosu na uobičajeni postupak potreban radi održavanja, odigravanja i kontrole utakmice.

Član 23.

Ukoliko određeni sudija ne dođe na utakmicu stalnog takmičenja, utakmicu će suditi:

- četvrti sudija u ligama gdje se određuju četvrte sudije, s tim što je četvrti sudija sa »A« liste;
- prvi asistent sudija u ligama gdje se određuju trojica sudija, s tim što je prvi asistent sudija sa »A« liste.

Ukoliko na utakmicu ne dođe ni sudija, ni određeni asistenti sudija, klubovi će se sporazumjeti da utakmicu sudi jedan od prisutnih sudija, koji mora biti na listi suđenja tog ili višeg ranga takmičenja.

Ukoliko sporazum ne bude postignut, delegat utakmice će odrediti koji će prisutni sudija suditi utakmicu, što će se konstatovati u zapisniku sa utakmice.

Sporazum o izboru sudije mora biti pismeno utvrđen prije početka utakmice.

Zapisnik o sporazumu potpisuju oba kapitena i delegat utakmice. Ovaj zapisnik se prilaže zapisniku sa utakmice.

Ako na utakmicu ne dođe ni sudija, ni asistenti sudije, ni delegat, može se odigrati prijateljska utakmica. Ukoliko na utakmicu dođe sudija, a ne dođe jedan ili obojica sudija-asistenata, sudija će odlučiti o izboru sudije-asistenta, odnosno asistenata sudija, koji moraju biti na listi suđenja tog ili višeg ranga takmičenja.

Treneri

Član 24.

Trener može obavljati svoju dužnost na javnim utakmicama samo ako ima važeću trenersku licencu u određenom klubu, izdatu u skladu sa odredbama odgovarajućeg pravilnika, a provjerenu putem Comet informacionog sistema, ukoliko se takmičenje administrativno vodi putem pomenutog informacionog sistema.

Prije početka utakmice, prilikom utvrđivanja spiska igrača koji nastupaju na utakmici, delegat na utakmici putem Comet informacionog sistema (ukoliko se takmičenje administrativno vodi putem navedenog informacionog sistema) dužan utvrditi da li trener ima važeću trenersku licencu.

Ako delegat utakmice ustanovi da trener nema važeću trenersku licencu, neće mu dozvoliti ulazak u ograđeni dio terena za igru.

Predstavnik kluba

Član 25.

Svaki klub mora odrediti zvaničnog predstavnika sa pismenim ovlaštenjem kluba i izdatom licencom, na utakmicama stalnog takmičenja, čija se prava i obaveze utvrđuju propozicijama.

Predstavnik kluba ne može biti trener ekipe koji je dobio licencu u toj takmičarskoj sezoni, niti trener koji je u toj takmičarskoj sezoni dobio licencu za

vođenje drugog kluba. Predstavnik kluba mora imati istaknutu akreditaciju.

Voditelj / komesar bezbjednosti

Član 26.

Klub organizator je dužan odrediti voditelja osiguranja/komesar bezbjednosti, kao osobu nadležnu za sva pitanja bezbjednosti i sigurnosti na stadionu u sklopu organizacije utakmice.

Voditelj osiguranja/komesar bezbjednosti može biti osoba koja je dio uprave administracije kluba na osnovu pisanog ugovora i odluke o imenovanju.

Osoba koja zadovoljava kriterij, mora biti licencirana od strane Komiteta za bezbjednost NS/FS BIH za klubove Premijer lige BIH, a za ostale klubove od strane komisija za bezbjednost entitetskih saveza.

Voditelj za sigurnost/komesar bezbjednosti mora imati iskustvo o pitanjima koja su povezana s kontrolom publike, zaštitom i sigurnošću na nogometnim objektima, javnim redom, pitanjima ulaznica i organizacijom utakmica.

Zadaci voditelja osiguranja/komesara bezbjednosti, njegove obaveze i prava moraju biti u skladu sa svim odredbama iz Pravilnikom o bezbjednosti na stadionima.

Zapisnik sa utakmice

Član 27.

Za sve javne utakmice obvezno se sastavlja zapisnik sa utakmice elektronski, putem Comet informacionog sistema ili prema obrascu i uputstvu nadležnog takmičarskog organa.

Član 28.

Sudija i delegat su obavezni da po završenoj utakmici unesu u zapisnik sa utakmice imena isključenih, opomenutih i zamijenjenih igrača, kao i svaki incident ili nezgodu koja se dogodila na utakmici na način kako je regulisano uputstvom o radu i obavljanju dužnosti delegata na utakmici.

Član 29.

Zapisnik sa utakmice sastavlja delegat utakmice u posebnoj prostoriji isključivo u prisustvu sudije, asistentata sudija i po jednog ovlaštenog predstavnika kluba (samo kada se sastavlja prva strana zapisnika).

U slučaju da se ne koristi Comet informacioni sistem, prva strana zapisnika sa utakmice obavezno se sastavlja prije početka utakmice, a potpisom je ovjeravaju predstavnici klubova.

Po završenoj utakmici prvu stranu zapisnika potpisuje i sudija utakmice u skladu sa Propozicijama takmičenja. Izvještaj sudije potpisuje sudija utakmice, a izvještaj delegata i izvještaj o fair playu nastupu ekipa potpisuje delegat utakmice.

Član 30.

Zapisnik sa utakmice smatra se javnom ispravom i podaci u njemu su tačni sve dok se ne dokaže suprotno. Ako se u podacima unesenim u zapisnik sa utakmice utvrdi greška, nadležni takmičarski organ će izvršiti ispravku utvrđene greške tako da odgovara činjeničnom stanju.

Ispravka grešaka upisanih u zapisnik sa utakmice vrši se po službenoj

dužnosti - sravnavanjem podataka iz zapisnika sa utakmice sa izvještajima sudije, sudija asistenata i delegata utakmice, kao i posebnim podneskom nadležnom takmičarskom organu, prije odigravanja narednog kola.

Zahtjev za ispravku netačno upisanih podataka može se podnijeti najkasnije u roku od 48 (četrdesetosam) sati po odigranoj utakmici. Kopija zahtjeva u istom roku i na isti način dostavlja se drugom klubu učesniku utakmice.

Nadležni takmičarski organ je dužan da o zahtjevu odluči prije odigravanja narednog kola, te o izvršenoj ispravci obavjesti oba kluba utakmice.

Odluka o ispravci greške u zapisniku sa utakmice nadležni takmičarski organ objavljuje u službenom glasniku.

Član 31.

Obrazac zapisnika sa utakmice i uputstvo za njegovo sastavljanje za utakmice u futsalu izrađuje i izdaje nadležni takmičarski organ.

Uslovi za učešće u takmičenju

Član 32.

Klubovi koji podliježu licenciranju klubova obavezni su ispunjavati uslove za takmičenje iz Pravilnika o licenciranju klubova NS/FS BiH.

Član 33.

Uslovi za učešće ostalih klubova, uključujući i klubove futsala utvrđuju se propozicijama takmičenja koje donose nadležni savezi.

Član 34.

Žalbe na dimenzije terena za igru koje nisu u skladu sa Pravilnikom o licenciranju klubova ili propozicijama odnosnog takmičenja, mogu se podnijeti pod uslovom da je podnosilac žalbe o tome uložio pismeni prigovor sudiji prije početka utakmice, što će delegat obavezno konstatovati u zapisniku sa utakmice.

Organizacija utakmica

Član 35.

Odredbe o organizaciji i redu na stadionima – terenima za igru donose nadležni takmičarski organi u skladu sa Propozicijama takmičenja.

Za organizaciju utakmice odgovoran je klub – domaćin.

Prijateljske utakmice i turniri

Član 36.

Svaki klub mora imati odobrenje nadležnog organa za organizovanje turnira. Odobrenje iz prethodnog stava izdaje nadležni takmičarski organ i to:

- a) za organizaciju međunarodnih prijateljskih utakmica i turnira – administracija NS/FS BiH, a sve u skladu sa odredbama FIFA Pravilnika o međunarodnim utakmicama;
- b) za sve ostale prijateljske utakmice i turnire – nadležni takmičarski organi

entitetskih saveza.

Zahtjev za odobrenje odigravanja turnira podnosi se najkasnije 15 (petnaest) dana prije predviđenog početka turnira uz predočavanje propozicija takmičenja.

Svaka međunarodna prijateljska utakmica klubova Premijer lige, Prve lige Federacije i Prve lige RS mora biti prijavljena administraciji NS/FS BiH, a međunarodne prijateljske utakmice ostalih klubova nadležnom takmičarskom organu, na čijem se području utakmica igra.

Prijava međunarodnih utakmica, kao i službenih lica, mora biti u roku od 8 (osam) dana prije početka utakmice, izuzetno ukoliko je došlo do promjene ekipa, prijavu izvršiti 48 (četrdesetosam) sati prije utakmice.

Klub koji se ne pridržava prednjih odredbi odgovoran je po odredbama Disciplinskog pravilnika NS/FS BiH.

Član 37.

U roku od 8 (osam) dana od dana povratka iz inostranstva, klub je obavezan organu koji mu je izdao dozvolu za odlazak u inostranstva, dostaviti izvještaj o gostovanju.

U slučaju isključenja igrača na utakmicama u inostranstvu, klub je obavezan u roku od 3 (tri) dana od povratka, dostaviti izvještaj, izjavu predstavnika kluba i igrača o isključenju.

Ocjena podobnosti terena za igru

Član 38.

Utakmice se mogu igrati samo na terenu koji je dobar za igru.

Domaći klub je obavezan da teren pripremi za igru tako da bude potpuno dobar za odigravanje utakmica stalnog takmičenja.

Utvrđivanje podobnosti terena mora biti izvršeno u prisustvu sudije i kapitena oba zainteresovana kluba i to u trenutku koji je službeno određen za početak utakmice.

Izuzetno, pregled može biti izvršen i ranije, ali istog dana i u prisustvu oba kapitena i sudije.

Sudija utakmice jedini odlučuje da li je teren dobar za igru zbog nevremena, drugih okolnosti koje se smatraju višom silom, ili zbog nemarnosti kluba domaćina.

Sudija i delegat utakmice su obavezni da u zapisnik sa utakmice unesu ocjenu o nepodobnosti terena i zapisnik odmah dostave sa detaljnim opisom stanja nadležnom takmičarskom organu, uz prethodno telefonsko obavještanje.

Najmanji broj igrača

Član 39.

Utakmica ne može početi ako jedna od ekipa ima manje od 7 (sedam) igrača (nogomet/fudbal), odnosno manje od 3 (tri) igrača (futsal).

Igrači koji ne nastupe od početka utakmice mogu naknadno ući u igru sve do kraja utakmice na način predviđen Pravilima nogometne/fudbalske igre (nogometa/fudbala i futsala), ukoliko su prije početka utakmice upisani u zapisnik sa utakmice kao igrači ili zamjenski igrači.

Član 40.

Ako jedna ekipa za vrijeme utakmice ostane sa manje od 7 (sedam) igrača u nogometu/fudbalu, odnosno manje od 3 (tri) u futsalu, sudija je dužan da prekine igru, ukoliko ekipa nije u mogućnosti da u roku od 5 (pet) minuta nastupi sa minimalnim brojem igrača.

Član 41.

Na prvenstvenim i kup utakmicama u nogometu/fudbalu mogu se tokom igre zamijeniti najviše 3 (tri) igrača, uključujući i vratara, a u futsalu svi zamjenski igrači sa neograničenim brojem zamjena, ukoliko drugačije nije propisano propozicijama datog takmičenja.

Zamjena se može vršiti samo igračima koji su prije početka utakmice upisani u zapisnik sa utakmice, a njih može biti najviše 7 (sedam) u nogometu/fudbalu, odnosno najviše 9 (devet) u futsalu, ukoliko drugačije nije propisano propozicijama datog takmičenja.

Oprema igrača

Član 42.

Ako su dresovi ekipa iste ili slične boje, dresove će promijeniti domaća ekipa, odnosno prvoimenovana ekipa.

Ako su dresovi ili majice prugasti ili šareni, brojevi moraju biti na jednobojnoj podlozi i moraju biti u skladu sa Pravilima nogometne igre.

Klubovi su obavezni osigurati majice/markere različitih boja od sportske opreme zamjenskih igrača.

Za vrijeme odigravanja utakmice igrači na poleđini dresova moraju imati vidljive brojeve propisane veličine.

Brojevi na dresovima igrača moraju se slagati sa brojevima upisanim u zapisnik sa utakmice.

Bliže odredbe o boji opreme, brojevima i sl. određuju se Propozicijama takmičenja nadležnog takmičenja i Pravilima igre.

Na 15 (petnaest) dana prije početka svakog stalnog takmičenja, sve ekipe su obavezne da rukovodstvo takmičenja obavijeste o boji dresova u kojima će nastupiti u odnosnom takmičenju.

Utvrđivanje plasmana

Član 43.

Ekipa koja pobjedi na utakmici stalnog takmičenja koje se odvija po bod-sistemu, osvaja tri boda, a u slučaju neriješenog rezultata oba tima osvajaju po jedan bod.

Za svako stalno takmičenje koje se igra po bod-sistemu vodi se tabela. Tabela sadrži: rezultate utakmica odgovarajućeg kola, imena timova koji se takmiče, broj utakmica, pobjeda, neriješenih rezultata i poraza, broj datih i primljenih pogodaka i broj osvojenih bodova.

Plasman na tabeli utvrđuje se zbirom osvojenih bodova.

Ako timovi osvoje isti broj bodova, odlučuje razlika između datih i primljenih pogodaka.

U slučaju da je razlika jednaka, bolje mjesto zauzima ekipa koja je postigla više pogodaka, a ako su postigli isti broj pogodaka, onda dijele mjesto koje im pripada.

Izuzetno, ako je riječ o mjestu koje odlučuje o prvaku ili mjestu koje povlači prelaz u viši ili niži stepen takmičenja, ili o mjestu koje osigurava učešće u međunarodnim takmičenjima, kod jednakog broja bodova, plasman se određuje na osnovu dodatne pomoćne tabele, na osnovu rezultata koje su u međusobnim susretima ostvarili ekipe sa jednakim brojem bodova.

Plasman na dodatnoj tabeli utvrđuje se zbirom osvojenih bodova.

Ako je zbir bodova jednak, odlučuje razlika između datih i primljenih pogodaka, s tim što pogodak u gostima vrijedi dvostruko. Ako je razlika jednaka, odlučuje veći broj postignutih pogodaka, a ukoliko je i to jednako odlučuje ukupna pogodak razlika u predmetnom takmičenju svih ekipa. Ako se ni na ovakav na čin ne može utvrditi uspješnija ekipa, ekipe odlučuju međusobnim odigravanjem dvije utakmice po kup-sistemu.

Ukoliko je riječ o tri ili više ekipa koji imaju jednak broj bodova, istu pogodak-razliku i isti broj postignutih pogodaka, pitanje pobjednika rješava se na neutralnom terenu po jednostrukom bod-sistemu - ako se radi o tri ekipe, odnosno po jednostrukom kup-sistemu na neutralnom terenu - ako se radi o četiri ili više ekipa.

Propozicijama takmičenja može se predvidjeti drugačiji način razigravanja za slučajeve kada se u dodatnoj tabeli nađu tri ili više ekipa koje imaju jednak broj bodova, istu pogodak-razliku i isti broj postignutih pogodaka.

Član 44.

U slučaju da ekipe na utakmici koja se odigrava po jednostrukom kup-sistemu postignu isti broj pogodaka, u cilju utvrđivanja plasmata, pristupit će se izvođenju udaraca sa tačke za kazneni udarac za dobijanje pobjednika na utakmici na način utvrđen Pravilima nogometne/fudbalske igre.

Član 45.

Ako utakmice odigrane po dvostrukom kup-sistemu nisu dale pobjednika ni poslije primjene pravila da pogodak na strani vrijedi više, onda se utvrđivanje pobjednika vrši izvođenjem udaraca sa tačke za kazneni udarac za dobijanje pobjednika na utakmici naposredno poslije druge utakmice.

Pravo nastupa igrača

Član 46.

Na utakmicama stalnih takmičenja mogu nastupati samo igrači koji su stekli pravo igranja po osnovu izvršene registracije, a prije početka utakmice su upisani u zapisnik sa utakmice kao igrači ili zamjenski igrači, izuzev igrača koji se nalaze pod kaznom ili suspenzijom nadležnog nogometnog/fudbalskog organa, kao i igrača koji se nalaze na izdržavanju kazne zatvora.

Da bi nastupio na utakmici, igrač mora ispoštovati sve procedure koje su propisane usljed pandemije COVID-19.

Na utakmicama u BiH i izvan BiH mogu nastupiti igrači koji su stekli pravo igranja na tim utakmicama prema odredbama Pravilnika o registracijama klubova i

igrača i statusu i transferu igrača NS/FS BiH.

Izuzetno od odredbi stava 3. ovog člana, na prvenstvenim i kup utakmicama, kao i utakmicama dodatnih kvalifikacija, ne mogu nastupati igrači koji su po bilo kojem osnovu registrovani i čije su registracije objavljene nakon roka od 30 (trideset) dana prije odigravanja rasporedom utvrđene posljednje prvenstvene utakmice.

Pod javnim utakmicama se podrazumijeva svaka utakmica koja se igra u okviru nekog takmičenja, kao i utakmica koja se javno objavljuje preko sredstava javnog informisanja (prijateljska ili humanitarna), ili utakmica koja donosi prihod u bilo kojem vidu.

Član 47.

Ako je odlukom nadležnog takmičarskog organa određeno ponovno odigravanje utakmice stalnog takmičenja, na novoj utakmici mogu nastupiti svi igrači koji imaju pravo nastupa na dan odigravanja nove utakmice.

Član 48.

Na utakmicama predtakmičarskog uzrasta mogu nastupiti igrači koji na dan utakmice nisu mlađi od 6 (šest) godina, a na dan 01. januara/siječnja te takmičarske sezone nisu stariji od 8 (osam) godina.

Na utakmicama cicibana mogu nastupiti igrači koji na dan utakmice nisu mlađi od 8 (osam) godina, a na dan 01. januara/siječnja te takmičarske sezone nisu stariji od 10 (deset) godina.

Na utakmicama predpionira mogu nastupiti igrači koji na dan utakmice nisu mlađi od 10 (deset) godina, a na dan 01. januara/siječnja te takmičarske sezone nisu stariji od 12 (dvanaest) godina.

Na utakmicama pionira mogu nastupiti igrači koji na dan utakmice nisu mlađi od 12 (dvanaest) godina, a na dan 01. januara/siječnja te takmičarske sezone nisu stariji od 14 (četnaest) godina.

Na utakmicama kadeta mogu nastupiti igrači koji na dan odigravanja utakmice nisu mlađi od 14 (četnaest) godina, a na dan 01. januara/siječnja te takmičarske sezone nisu stariji od 16 (šesnaest) godina.

Na utakmicama juniora mogu nastupiti igrači koji na dan utakmice nisu mlađi od 16 (šesnaest) godina, a na dan 01. januara/siječnja te takmičarske sezone nisu stariji od 18 (osamnaest) godina.

Izuzetno, na utakmicama kadeta i juniora može nastupiti i igrač mlađi jednu godinu od naznačene, ako je od specijalne ljekarske komisije proglašen sposobnim za nastupanje na tim utakmicama, pod uslovom da mu je to pravo potvrđeno od strane nadležnog organa za registraciju i uneseno u Comet informacioni sistem.

Ako ekipa na utakmici predpionira, pionira, kadeta i juniora nastupi sa igračem koji nije ispunio uslove iz prethodnih stavova, odgovarat će prema odredbama Disciplinskog pravilnika NS/FS BiH, s tim što će klub snositi i druge posljedice predviđene ovim Pravilnikom.

Član 49.

Na utakmicama ostalih ekipa igrač stiče pravo nastupa nakon navršenih 17 (sedamnaest) godina.

Izuzetno od ovoga, na utakmicama ostalih ekipa može nastupiti i igrač sa navršenih 16 (šesnaest) godina, ako je od specijalne ljekarske komisije proglašen sposobnim za nastupanje na utakmicama, s tim da mu je to pravo potvrdio nadležni

organ za registraciju i unio u Comet informacioni sistem.

Ako klub na utakmici ostalih ekipa nastupi sa igračem koji nije ispunio uslove iz stavova 1. i 2. ovog člana, nadležni takmičarski organ će protiv njega pokrenuti postupak pred nadležnim disciplinskim organom.

Član 50.

Specijalni ljekarski pregled važi 6 (šest) mjeseci za igrača juniora za nastup u prvom ekipi, a 4 (četiri) mjeseca za pionira, odnosno kadeta za nastup u kadetskom, odnosno juniorskom ekipi.

Sa specijalnim ljekarskim pregledom, sve dok je na snazi, igrač može nastupiti na svim utakmicama, bez obzira na rok važnosti redovnog ljekarskog pregleda.

Član 51.

Igrač ne može u istom danu nastupiti na dvije utakmice.

Ako klub nastupi na javnoj utakmici sa igračem koji je toga dana već igrao na jednoj utakmici, bit će pokrenut disciplinski postupak protiv kluba i protiv igrača prema odredbama Disciplinskog pravilnika NS/FS BiH, s tim što će klub snositi i druge posljedice predviđene ovim Pravilnikom, ukoliko je ovaj prekršaj učinjen na utakmici stalnog takmičenja.

Igrači futsala mogu u istom danu nastupiti na dvije utakmice i za taj nastup klub i igrač ne mogu snositi nikakve posljedice.

Član 52.

Na značajnim međunarodnim turnirima i međunarodnim utakmicama u BiH i inostranstvu, izuzetno mogu gostovati najviše dva igrača iz drugog kluba, uz saglasnost svog kluba i prethodno odobrenje organa koji odobrava međunarodne utakmice

U izuzetnim slučajevima, može gostovati i više igrača, o čemu odlučuje organ iz prethodnog stava ovog člana.

Protiv igrača i kluba koji prekrši ovaj propis, bit će pokrenut disciplinski postupak prema odredbama Disciplinskog pravilnika NS/FS BiH.

Član 53.

Registrovanom igraču jednog kluba može se izuzetno odobriti gostovanje na prijateljskoj utakmici u drugom klubu u slijedećim slučajevima:

- a) ako se utakmica igra u dobrotvorne svrhe;
- b) ako se utakmica igra povodom značajnih datuma i proslava opšteg i lokalnog karaktera;
- c) ako se utakmica igra u okviru propagandnih sportskih manifestacija ili značajnih proslava sportskih organizacija.

Član 54.

Odobrenje iz prethodnog člana, na pismeni zahtjev kluba za koji treba da nastupi igrač i uz pismenu saglasnost kluba za koji je taj igrač registrovan, izdaje savez kojem pripada klub koji traži odobrenje.

Utvrđivanje identiteta igrača

Član 55.

Na prvenstvenim i kup utakmicama mogu nastupiti samo igrači koji su operativni u Comet informacionom sistemu, a čiji se identitet utvrđen, utvrđuje putem Comet informacionog sistema ili na osnovu lične/osobne karte i pasoša/putovnice, a što će biti propisano propozicijama datog takmičenja.

Identitet igrača i zamjenika (zamjenskih igrača) utvrđuje se prije početka utakmice, a za vrijeme odmora između dva dijela utakmice, ili po završetku utakmice samo za one igrače koji nisu stigli na početak utakmice.

Način utvrđivanja identiteta za igrače predtakmičare, cicibane, predpionire, pionire, kadete i juniore, ukoliko iz bilo kojih razloga na utakmici nemaju sportske legitimacije/iskaznice, određuje se propozicijama odnosnog takmičenja.

Izuzetno od odredaba iz prethodnih stavova, klub može na sopstveni rizik staviti u tim igrača, koji nema ličnu/osobnu kartu ili pasoš/putovnicu, pod uslovom da se identitet ovog igrača utvrdi najkasnije 15 (petnaest) minuta po završetku igre i to konstatuje delegat u zapisniku sa utakmice.

Ljekarski pregled igrača

Član 56.

U Comet informacioni sistem se za svakog igrača mora unijeti nalaz o izvršenom ljekarskom pregledu, ili izuzetno, zvanična potvrda o izvršenom ljekarskom pregledu.

Kao zvanična potvrda u smislu stava 1. ovog člana, smatrat će se potvrda izdata na osnovu zvaničnog registra o izvršenim ljekarskim pregledima ustanove osposobljene za poslove sportske medicine.

Rok važenja ljekarskog pregleda za igrača koji na dan pregleda ima 17 i više godina je 6 (šest) mjeseci, a za mlađe igrače je 4 (četiri) mjeseca.

Igrač koji nije ljekarski pregledan, odnosno koji nije obavio ljekarski pregled u određenom roku, igrač kojem je od strane ljekara zabranjeno igranje, ili se nalazi na bolovanju, kao i igrač kojem ljekarski pregled nije unesen u Comet informacioni sistem, a delegatu utakmice nije dostavljena na uvid zvanična potvrda o izvršenom ljekarskom pregledu, ne može nastupiti na javnoj utakmici, odnosno, delegat će takvom igraču zabraniti nastup.

Ljekarski pregled obavlja se u nadležnoj zdravstvenoj-sportskoj instituciji ili određenoj zdravstvenoj ustanovi.

Protiv kluba i igrača koji prekrše gornje odredbe bit će pokrenut disciplinski postupak, s tim što će snositi i druge posljedice predviđene ovim Pravilnikom.

Član 57.

Klub domaćin obavezan je da osigura prisustvo medicinske službe na svim javnim utakmicama. Bliže odredbe o ovoj službi uređuju se Propozicijama određenog stepena takmičenja.

Nedolazak na utakmicu stalnog takmičenja

Član 58.

Ako u roku od 15 (petnaest) minuta od određenog vremena za početak utakmice stalnog takmičenja jedna ekipa ne nastupi sa potrebnim brojem igrača,

sudija će saopštiti kapitenu ekipe koji je nastupio da se utakmica neće odigrati i to će upisati u zapisnik sa utakmice.

Nadležni takmičarski organ registrovat će utakmicu po službenoj dužnosti rezultatom 3:0 (par forfe), ukoliko konstatuje da je nedolazak ekipe na utakmicu neopravdan.

Klub koji je iz bilo kojeg razloga odgovoran za neodigravanje utakmice dužan je nadoknaditi štetu drugom klubu. Visinu štete na osnovu dokumentovanog zahtjeva kluba koji je oštećen, utvrđuje nadležni takmičarski organ.

Neodigravanje i prekid utakmice

Član 59.

Ako klub domaćin nije osposobio teren za prije početka ili za vrijeme utakmice, a sudija odluči da se utakmica ne može igrati ili prekinuta nastaviti, što mora biti konstatovano u zapisniku sa utakmice, odgovoran je prema odredbama Disciplinskog pravilnika NS/FS BiH, a utakmica se registruje službenim rezultatom 3:0 (par-forfe) u korist protivnika.

U slučaju da ekipa nije mogla da nastupi usljed više sile tj. opravdanih razloga koji se nisu mogli predvidjeti, izbjeći ili otkloniti (elementarne nepogode, nevrijeme, magla, nestanak električne energije, i dr.), sudija će sačekati vodeći računa da se utakmica može završiti na vrijeme.

Ako se igra više utakmica na istom terenu, sudija je dužan da vodi računa o tome da ne dovodi u pitanje odigravanje slijedeće utakmice.

Ako je utakmica stalnog takmičenja morala biti prekinuta zbog više sile, o čemu odlučuje sudija, ili je utakmica prekinuta zbog nastupa dana žalosti, odigrat će se nova utakmica ukoliko je do prekida došlo prije isteka 80% regularnog vremena određenog za igru.

U regularno vrijeme određeno za igru u smislu predhodnog stava smatra se vrijeme provedeno u efektivnoj igri obje ekipe od momenta početka utakmice.

Vrijeme koje igrači obje ekipe u toku utakmice provedu van ili na terenu za igru, kao posljedica privremenog prekida utakmice po bilo kom osnovu, ne računa se u regularno vrijeme određeno za igru, a o njegovom trajanju odlučuje sudija.

U slučaju privremenog prekida igre, koja nije mogla biti nastavljena po odluci sudije, kao vrijeme prekida utakmice računa se vrijeme do trenutka privremenog prekida utakmice.

Ukoliko je utakmica prekinuta iz razloga više sile, a prije isteka 80% regularnog vremena ili zbog više sile nije odigrana, utakmica će se odigrati narednog dana u isto vrijeme, a ako se ne može odigrati ni narednog dana nadležni takmičarski organ će utvrditi novi termin za odigravanje utakmice.

Odluku o vremenu odigravanja nove utakmice donosi nadležni takmičarski organ, a troškove nove utakmice snose klubovi kao i za ostale prvenstvene i kup utakmice.

Ako je utakmica prekinuta nakon isteka 80% regularnog vremena određenog za igru, registrovat će se postignutim rezultatom.

Klub koji ne pristupi odigravanju nove utakmice, koju odredi nadležni takmičarski organ odgovoran je prema odredbama Disciplinskog pravilnika NS/FS BiH, a utakmica se registruje po službenoj dužnosti rezultatom 3:0 (par-forfe) u korist protivnika.

Ako obje ekipe neopravdano ne dođu na odigravanje nove utakmice smatrati

će se da su odustali od daljnjeg takmičenja, te će snositi posljedice predviđene ovim Pravilnikom i Disciplinskim pravilnikom NS/FS BiH.

Član 60.

Ekipe koje napusti teren, odnosno ekipa koja izazove prekid utakmice, uključujući i prekid utakmice koji je izazvao igrač te ekipe, gubi utakmicu rezultatom 3:0 (par-forfe), ukoliko do prekida njegov protivnik nije postigao bolji rezultat.

Odluku o registraciji utakmice 3:0 (par-forfe) donosi po službenoj dužnosti nadležni takmičarski organ.

Član 61.

Ako je neka utakmica prekinuta zbog incidenta, nereda, nedovoljnog broja igrača, nepoštivanja odluke sudije da isključeni igrač napusti teren i sl., a utvrdi se da je za prekid odgovoran jedan od učesnika, utakmica će se registrovati rezultatom 3:0 (par-forfe) u korist protivničke ekipe, ukoliko do prekida protivnička ekipa nije postigla bolji rezultat.

Ako nadležni takmičarski organ utvrdi da za prekid igre nije odgovoran nijedan od klubova učesnika, odnosno da su za prekid odgovorni podjednako oba kluba, i da je organizator utakmice preduzeo sve mjere predviđene odlukom nadležnog takmičarskog organa o organizaciji i osiguranju reda na utakmicama određenog stepena takmičenja, nadležni takmičarski organ može odlučiti da se odigra nova utakmica ili da se prekinuta utakmica registruje postignutim rezultatom.

U slučaju prekida utakmice zbog nereda ili ozbiljnog incidenta, nadležni takmičarski organ može suspendovati odgovarajuću ekipu od odigravanja utakmica na tom stadionu ili određenom području za vrijeme vođenja postupka, do donošenja odluke nadležnog disciplinskog organa.

Zabrana nastupa zbog suspenzije

Član 62.

Suspendovani klub, odnosno sve ekipe suspendovanog kluba, ne mogu nastupati na javnoj utakmici u vrijeme trajanja suspenzije.

Sve utakmice koje su prema rasporedu takmičenja predviđene da se odigraju u vrijeme suspenzije izrečene zbog neizvršavanja pravosnažnih odluka nadležnih organa ili neizvršenja nespornih obaveza nastalih iz takmičenja predviđenih propozicijama nadležnog takmičenja, će biti registrovane rezultatom 3:0 (par-forfe) u korist protivnika.

Ostale utakmice na kojima ekipa nije mogla nastupiti zbog trajanja suspenzije do okončanja nekog postupka, neće biti registrovane sve dok se ne donese konačna odluka. Po donošenju konačne odluke, klub je dužan odigrati utakmice prema rasporedu nadležnog takmičarskog organa.

Ako je suspenzija nastala po odluci disciplinskog organa zbog neizmirenja obaveza, a u međuvremenu se zaključi sporazum o načinu izmirenja obaveza ili se obaveza izmiri, smatrat će se da je suspenzija automatski prestala danom potpisa sporazuma ili danom dostavljanja dokaza o izmirenju obaveze, a najkasnije u roku do 48 sati prije odigravanja prve naredne utakmice.

Ako suspendovana ekipa nastupi na javnoj utakmici, nadležni takmičarski

organ će protiv iste pokrenuti disciplinski postupak, s tim što će klub snositi i takmičarske posljedice ukoliko je na utakmicu uložena žalba prema odredbama ovog Pravilnika.

Protiv kluba koji nastupi protiv suspendovanog ili kažnjenog kluba, ukoliko je blagovremeno obaviješten o suspenziji ili kazni, nadležni takmičarski organ će pokrenuti disciplinski postupak.

Odustajanje od takmičenja

Član 63.

U slučajevima kada je klub rasformiran, kada prestane sa radom ili odustane od takmičenja u toku jesenje polusezone ili od završetka jesenje polusezone do početka proljetne polusezone, biti će brisan iz takmičenja.

Sve utakmice koje je brisan klub do tada odigrao će se smatrati kao da nisu igrane, a utakmice koje su naredne po rasporedu neće se registrovati po službenoj dužnosti rezultatom 3:0 (par-forfe) u korist njegovih protivnika.

U slučajevima kada se klub rasformira, prestane sa radom ili odustane od takmičenja u toku proljetne polusezone, sve njegove do tada odigrane utakmice registrovat će se postignutim rezultom, a sve utakmice koje su naredne po rasporedu registrovat će se po službenoj dužnosti rezultatom 3:0 (par-forfe) u korist njegovih protivnika.

U vezi sa stavovima 2. i 3. ovog člana, prvenstveno takmičenje se dijeli na dva dijela na način da se zbir ukupnog broja prvenstvenih utakmica podijeli sa dva. Dobiveni rezultat označava koliko utakmica se treba odigrati u svakom dijelu prvenstva. Pri tome, ni kalendarsko vrijeme odigravanja utakmica niti način odigravanja (dvokružno, trokružno, ili više kružni sistem) nema značaja za određivanje dva dijela takmičenja. U slučajevima odigravanja takmičenja po jednostrukom bod sistemu, smatrat će se da je klub odigrao polovinu utakmica ako je odigrao više od 50% od ukupnog broja utakmica.

Član 64.

Smatrat će se da je klub odustao od takmičenja u rangu takmičenja u kojem nastupa, ako usljed svoje krivice nije odigrao 2 (dvije) utakmice u toku takmičarske sezone.

Ukoliko klub, a nakon obavljenog žrijeba, svojom krivicom odustane od kup-takmičenja ili neopravdano ne dođe na odigravanje utakmice, u dalje takmičenje će se plasirati protivnički klub.

Ukoliko se takmičenje organizuje po dvostrukom kup-sistemu, a klub neopravdano ne dođe na odigravanje druge utakmice, u dalje takmičenje će se plasirati protivnički klub bez obzira na rezultat prve utakmice.

Klub koji odustane od utakmice dužan je nadoknaditi štetu drugom klubu, a visinu štete na osnovu dokumentovanog zahtjeva oštećenog kluba utvrđuje nadležni takmičarski organ.

Klub koji odustane od takmičenja svojom krivicom snosi disciplinske posljedice prema odredbama Disciplinskog pravilnika NS/FS BiH.

Brisanje kluba iz takmičenja

Član 65.

Klub je dužan da svoje obaveze iz Propozicija takmičenja izvršava u rokovima koji su utvrđeni propozicijama takmičenja.

Izuzetno, u posebno opravdanim slučajevima, nadležni takmičarski organ može produžiti ovaj rok tako što se obaveze iz jedne takmičarske sezone moraju izmiriti najkasnije 15 (petnaest) dana prije početka takmičenja u slijedećoj takmičarskoj sezoni i to obavezno iz jesenje polusezone, najkasnije 15 (petnaest) dana prije početka proljetne polusezone i obratno.

Klub koji ne postupi u skladu sa prethodnim stavom biti će odlukom nadležnog takmičarskog organa brisan iz daljeg takmičenja, a ako je riječ o obavezama iz proljetne polusezone neće biti uključen u novo takmičenje.

Registracija utakmica

Član 66.

Ako na utakmicu nije uložena žalba, a ne postoje osnovi za registraciju utakmice po službenoj dužnosti rezultatom 3:0 (par-forfe), utakmica se registruje postignutim rezultatom.

Nadležni takmičarski organ registruje utakmicu u roku utvrđenom propozicijama odnosnog takmičenja, s tim što se registracija utakmice ne može izvršiti prije nego što proteknu rokovi za ulaganje žalbe.

Jednom registrovana utakmica stalnog takmičenja ne može biti poništena ako je prvostepena odluka postala pravosnažna, ili je u drugom stepenu donijeta odluka koja je konačna, izuzev u postupku za zaštitu ovog Pravilnika.

Ukoliko žalba bude uložena u roku, ništavna je odluka o registraciji utakmice izvršena prije isteka roka za ulaganje žalbe.

Žalba na odigrane utakmice

Član 67.

O regularnosti utakmice stalnog takmičenja može se odlučivati samo na osnovu žalbe oštećenog kluba, osim u slučajevima kada je odluka o registraciji donijeta po službenoj dužnosti.

Pod oštećenim klubom, u smislu prethodnog stava, podrazumijeva se svaki klub koji je oštećen rezultatom utakmice na koju se ulaže žalba.

Žalba na tok utakmice, ukoliko propozicijama takmičenja nije drugačije predviđeno, mora se elektronskim putem (telefaksom ili e-mail) koji ima automatski ispis, datum i vrijeme o najavi žalbe dostaviti u roku od 24 (dvadesetčetiri) sata po odigranoj utakmici, a obrazloženje žalbe u dva primjerka i dokaz o uplaćenju taksi, u roku od 48 (četrdesetosam) sati od dana odigravanja utakmice.

Žalbe po drugim osnovima moraju se također najaviti na način iz prethodnog stava, s tim da je rok pisanog obrazloženja žalbe u 2 (dva) primjerka i dokaz o uplaćenju taksi od 72 (sedamdesetdva) sata od dana odigravanja utakmice.

Ukoliko rok za ulaganje žalbe ističe u nedjelju ili državni praznik, rok za ulaganje žalbi produžava se za prvi naredni radni dan.

Neblagovremeno najavljene, neobrazložene, netaksirane i nedovoljno

taksirane žalbe neće se uzimati u postupak, već će biti odbačene, a utakmica će biti registrovana postignutim rezultatom.

Bliže odredbe o žalbenom postupku propisuju se propozicijama stalnog takmičenja. Propozicijama se može propisati skraćeni žalbeni postupak.

Član 68.

Žalbe u prvom stepenu, za sva stalna takmičenja, rješava nadležni takmičarski organ u roku od 8 (osam) dana od dana njenog ulaganja, ukoliko propozicijama takmičenja nije predviđen kraći rok, izuzev ako žalbeni razlozi ne spadaju u nadležnost drugog organa. U tom slučaju rješavanje žalbe se odlaže do donošenja konačne odluke nadležnog organa.

Žalbe na odluke iz prethodnog stava rješava nadležna Apelaciona komisija kao drugostepeni organ.

Protiv drugostepene odluke žalba nije dozvoljena.

Žalba na odluku prvostepenog organa i dokaz o uplaćenju taksi moraju se dostaviti u roku od 8 (osam) dana od dana prijema prvostepene odluke, ukoliko propozicijama odnosnog takmičenja nije predviđeno drugačije.

Član 69.

Ukoliko se navodi žalbe odnose na neregularnost nastavka utakmice putem izvođenja udaraca sa tačke za izvođenje kaznenih udaraca za dobijanje pobjednika, ako nadležni takmičarski organ utvrdi neregularnost, može donijeti odluku samo o ponovnom odigravanju utakmice.

U svim drugim slučajevima po utvrđivanju neregularnosti, utakmica će se poništiti i odredit će se ponovno odigravanje.

Član 70.

Po prijavi neposredno ili posredno oštećenog kluba, prijavi delegata ili sudije utakmice, nogometnog organa ili organizacije, kao i po službenoj dužnosti, nadležni takmičarski organ će automatski oduzeti onoliko bodova koliko ih je klub osvojio na toj utakmici, ako je klub učinio jedan od dole navedenih prekršaja:

1. nastupio sa igračem koji prema odredbama ovog Pravilnika nema dovoljan broj godina života za nastup u odgovarajućem timu;
2. nastupio sa igračem za koga nije plaćena članarina za tekuću godinu;
3. nastupio sa igračem koji u odnosu na ljekarski pregled ne ispunjava uvjete iz člana 56. ovog Pravilnika;
4. nastupio sa igračem koji je istog dana već nastupio na jednoj utakmici (što se ne odnosi na futsal).

Ako su oba kluba učinili bar po jedan prekršaj, onda se odredbe stava 1. ovog člana primjenjuju podjednako na oba kluba.

Ako je u pitanju prekršaj na kup utakmici, onda se tim koji je učinio prekršaj eliminiše iz takmičenja, a ako su oba kluba na toj utakmici učinili najmanje po jedan od navedenih prekršaja oba se eliminišu iz daljeg takmičenja.

Član 71.

Ako klub napravi jedan ili više sljedećih prekršaja, utakmica će biti

registrovana rezultatom 3:0 (par-forfe) u korist protivničkog kluba (ukoliko protivnički klub nije postigao bolji rezultat):

1. nastupio sa igračem koji za njega nije registrovan;
2. nastupio sa igračem za koga je u predviđenom roku, prema odredbama Pravilnika o registracijama klubova i igrača i statusu i transferu NS/FS BiH utvrđeno da je registrovan za dva kluba, ili je registrovan nepravilnom primjenom propisa o registraciji, a ukoliko se nakon roka za prigovor nadležnom organu za registraciju utvrdi da je igrač nepravilno registrovan, klub snosi samo disciplinske posljedice;
3. nastupio sa pravilno registrovanim igračem, koji ne ispunjava uslove iz propozicija odgovarajućeg takmičenja;
4. nastupio sa igračem za kojeg nije utvrđen identitet prema odredbama ovog Pravilnika i propozicijama odgovarajućeg takmičenja;
5. nastupio sa igračem koji se nalazi pod kaznom zabrane nastupanja, ili suspenzijom, ili ukoliko je klub nastupio pod suspenzijom;
6. nastupio sa igračem koji nije upisan u zapisnik prije početka utakmice;
7. zamijenio više od dozvoljenog broja igrača na toj utakmici ili je nastupio sa igračem koji je na istoj utakmici prethodno bio zamijenjen;
8. nastupio sa igračem starijih godišta u odgovarajućem timu prema odredbama ovog Pravilnika;
9. nastupio sa igračem koji obavlja sudijsku dužnost u istom stepenu takmičenja;
10. u slučaju nedolaska na ponovno odigravanje utakmice određenog od strane nadležnog takmičarskog organa;
11. ako je utakmica odigrana na terenu čije dimenzije nisu u skladu sa odredbama propisa o licenciranju klubova ili propozicija odnosnog takmičenja, s tim da je klub koji podnosi žalbu o tome sudiji podnio pismeni prigovor prije početka utakmice;
12. ukoliko klub domaćin svojom krivicom nije pripremio teren za igru, a to sudija konstatuje u zapisniku sa utakmice.

U slučaju postojanja nekog od prekršaja iz prethodnog stava, postupak donošenja odluke o registraciji utakmice 3:0 (par-forfe) pokreće nadležni takmičarski organ po službenoj dužnosti, prijavi delegata ili sudije, prijavi nogometnog organa ili organizacije, ili po žalbi neposredno ili posredno oštećenog kluba.

Ako je žalbu podnio klub koji je oštećen rezultatom utakmice između druga dva kluba, prethodne odredbe o registraciji utakmice rezultatom 3:0 (par-forfe) ne odnose se na taj klub nego na oštećeni klub koji je igrao utakmicu.

Pored registracije utakmice rezultatom 3:0 (par-forfe), nadležni takmičarski organ dužan je da u svim prednjim slučajevima nadležnom disciplinskom organu podnese prijavu protiv odgovornog lica u klubu, ili igrača.

Član 72.

Na osnovu žalbe oštećenog kluba, utakmica će biti poništena i određeno ponovno odigravanje, u slijedećim slučajevima:

1. ukoliko se u predviđenom postupku utvrdi da su i jedan i drugi klub nastupili pod okolnostima iz člana 62. ovog Pravilnika;
2. ukoliko je utakmica iz razloga više sile prekinuta prije isteka 80% regularnog vremena za igru;
3. ukoliko su u predviđenom postupku utvrdi da klub nije znao, niti je mogao znati za okolnosti iz člana 62. ovog Pravilnika;

4. ukoliko je nastupio sa igračem koji je suspendovan ili kažnjen zabranom igranja, ili je igrao utakmicu sa kažnjenim ili suspendovanim klubom, a o tome nije obaviješten prema odredbama Disciplinskog pravilnika NS/FS BiH;

5. ukoliko sudija nije primijenio, ili je pogrešno primijenio neke od bitnih odredaba Pravila nogometne/fudbalske igre, odluka Međunarodnog nogometnog odbora koji donosi Pravila igre i odluka NS/FS BiH, a ta povreda je uticala na konačan rezultat.

Član 73.

Bitna povreda Pravila nogometne/fudbalske igre, odluka Međunarodnog nogometnog odbora koji donosi Pravila igre i odluka NS/FS BiH (u daljem tekstu: povreda Pravila igre) postoji ako sudija nije primijenio neku odredbu koja je neposredno uticala na konačan ishod utakmice, a ta odluka se ne zasniva na slobodnom sudijskom uvjerenju.

Sve odluke koje su donijete na osnovu slobodnog sudijskog uvjerenja ("po sudijskom mišljenju", "ako sudija smatra", ili "po nahodjenju sudije"), ne mogu biti povrede bitnih odredaba Pravila igre.

Bitna povreda odredaba Pravila igre uvijek postoji:

1. ako je prvenstvenu ili kup utakmicu (u daljem tekstu: utakmicu) vodio sudija koji nije delegiran od nadležnog organa za delegiranje, odnosno ako nije postupljeno prema odredbama člana 23. ovog Pravilnika i propozicijama određenog takmičenja;

2. ako se utakmica igra na terenu čije dimenzije nisu u skladu sa odredbama Pravila igre i Propozicija odnosnog takmičenja, pod uslovom da je klub koji podnosi žalbu o tome podnio sudiji pismeni prigovor prije početka utakmice;

3. ako je suprotno Pravilima igre i ovom Pravilniku utakmica igrana sa većim, odnosno manjim brojem igrača od dozvoljenog;

4. ako je prvi ili drugi dio igre prema satu sudije utakmice trajalo duže, a nije u pitanju nadoknada izgubljenog vremena u igri, pa je u ovom vremenskom razmaku postignut pogodak koji je imao neposredan uticaj na konačan ishod utakmice;

5. ako je iz indirektnog slobodnog udarca postignut pogodak i sudija ovaj pogodak priznao, a taj pogodak je imao neposrednog uticaja na konačan ishod utakmice;

6. ako je prilikom ubacivanja lopte u igru, igrač ubacio loptu u vrata i sudija je ovo priznao kao pogodak, a taj pogodak je imao neposrednog uticaja na ishod utakmice;

7. ako je prilikom spuštanja lopte iz ruke, lopta udarena i neposredno ušla u vrata i sudija je ovo priznao kao pogodak, a taj pogodak je imao neposrednog uticaja na konačan ishod utakmice.

Poništenje utakmice po službenoj dužnosti

Član 74.

Po službenoj dužnosti će biti poništena utakmica i određeno njeno ponovno odigravanje ako se utvrdi da je sudija iz nečasnih pobuda uticao na rezultat utakmice koju je sudio.

Do poništenja utakmice može doći samo na osnovu pravosnažne odluke disciplinskog organa za djelo primanja mita ili pravosnažnog rješenja nadležnog

disciplinskog organa za istragu.

Poništenje po ovom postupku može se izvršiti do završetka takmičarskog perioda. Pokretanje postupka na osnovu prijave ili po službenoj dužnosti od strane nadležnog takmičarskog organa, moguće je samo do završetka takmičarskog perioda.

Pod završetkom takmičarskog perioda, u smislu ovog člana, podrazumijeva se dan kada je nadležni takmičarski organ utvrdio završnu tabelu odgovarajućeg takmičenja.

Neregularnost i lažiranje utakmice

Član 75.

Kada se od strane nadležnog disciplinskog organa utvrdi da su oba kluba lažirala utakmicu, utakmica će biti registrovana kao odigrana, postojeći rezultat se neće priznati, a osvojeni bodovi i postignuti pogotci neće se unijeti u tabelu.

Ukoliko lažiranje izvrši jedan klub, a to se utvrdi u odgovarajućem postupku, utakmica će se registrovati rezultatom 3:0 (par-forfe) za protivnički klub.

Ukoliko lažiranje izvrši treći klub, utakmica će se poništiti i odrediti ponovno odigravanje.

Svi gore pomenuti slučajevi povlače disciplinsku odgovornost.

Prekid prvenstva u slučaju više sile, proglašenja stanja nesreće ili vanrednog stanja

Član 76.

U slučaju kada se prvenstvo ne može nastaviti u slučaju više sile, proglašenja stanja nesreće ili vanrednog stanja od strane nadležnih organa entiteta ili države BiH, odluku o načinu proglašenja prvaka, ekipama koje učestvuju u UEFA takmičenjima, te ekipama koje napuštaju lige donosi izvršni odbor saveza koji rukovodi datim takmičenjem, na prijedlog nadležnog takmičarskog organa.

IV POSEBNE ODREDBE

Prijedlog za zaštitu zakonitosti

Član 77.

Protiv odluke drugostepenog organa, zainteresovana strana može podnijeti prijedlog za zaštitu zakonitosti ovog Pravilnika Izvršnom odboru NS/FS BiH.

Izvršni odbor NS/FS BiH može po pomenutom zahtjevu zatražiti mišljenje Pravnog komiteta NS/FS BiH.

Ako Izvršni odbor NS/FS BiH utvrdi da je zahtjev za preispitivanje odluke drugostepenog organa osnovan, donijet će odluku kojom će pravosnažnu odluku drugostepenog organa ukinuti i vratiti nadležnom organu na raspravljanje i odlučivanje ili ako nađe za shodno može sam donijeti konačnu odluku.

Ako Izvršni odbor NS/FS BiH ukine pravosnažnu odluku i vrati je na ponovno raspravljanje i odlučivanje nadležnom organu koju je donio, ovaj je dužan da raspravi

sva pitanja na koja mu je ukazao Izvršni odbor NS/FS BiH.

U slučaju da nadležno tijelo ne postupi po uputama Izvršni odbor NS/FS BiH isti je obavezan po službenoj dužnosti donijeti konačnu odluku.

V PRELAZNE I ZAVRŠNE ODREDBE

Član 78.

Izvršni odbor NS/FS BiH izdaje obavezno uputstvo i tumači nepredviđene slučajeve u vezi sa ovim Pravilnikom.

Član 79.

Ovaj Pravilnik stupa na snagu i primjenjuje se od takmičarske sezone 2020/2021.

Stupanjem na snagu ovog Pravilnika prestaju da važe odredbe Pravilnika o nogometnim/fudbalskim takmičenjima BiH, usvojenog na sjednici Izvršnog odbora NS/FS BiH, održanoj 16.11.2017. godine, s tim što će se prema odradbama tog Pravilnika rješavati sporovi koji su započeti, a u konačnici nisu riješeni do stupanja na snagu ovog Pravilnika.

PREDSJEDNIK

Elvedin Begić s.r.